

ընդարձակեալ 'ի նմա սենեակս և զխուցս 'ի բնակութիւն միարանոց :

Յետ վախճանի Կիրակոս Պատրիարքի, Խորհրդական հարք ևւ միարանք Ս. Աթոռոյն գրեալ ծանուցին 'ի Կոստանդինուպօլիս առ Պատրիարքն եւ առ իշխանաւորս ազգին զվախճան Կիրակոսի և զընարութիւն Յովհաննու Եպիսկոպոսի Մովսիսեան Զմիւռնացւոյ, որ Փոխանորդ էր 'ի մայրաքաղաքի անդ : Եւ 'ի Ժողովի հաւանեալ ազգայնոց ընդ ընարութիւն նորին՝ ծանուցին 'ի Դուռն և առին ըզՊերաթն Պատրիարքական ('ի 4 Յուլիսի . 1850) . և նորա կարգաւորեալ զգործս իւր անդ՝ մեկնեցաւ գնալ յերուսաղէմ՝ ուղեկցութեամբ հրաւիրակ վարդապետաց, զորս յղեալ էին Աթոռայինք, եւ հասեալ նորա յերուսաղէմ, նստաւ հանդիսիւ յԱթոռ Պատրիարքութեան յաւուր տօնի Սրբոց Հրեշտակապետաց, ('ի 11 Նոյեմբեր ամսոյ), և ըսկըսաւ վարեւ զիշխանութիւն Պատրիարքութեան իւրոյ :

Գ Լ Ո Ւ Խ Կ .

Գործք Յովհաննու : Վախճան Պօղոս Եպիսկոպոսի : Խնդիր Ս. Տեղեաց : Աֆիֆ Պէ : Ժողով 'ի Ս. Յարութիւն և յապարանս Բդեշիսին : Հրու վարտակ Արքայի 'ի ձեռս Յունաց :

ՅՈՎՀԱՆՆԵՍ Պատրիարք յառաջին ամի դաճակալութեան իւրոյ ետ հիմն արկանել ընդարձակ եւ հոյակապ Պատրիարքարանի 'ի Թաղն Ս. Մինասայ, ձգեալ կամարս 'ի վերայ ճանապարհի և երկայնեալ 'ի պարտէզն դէպ յարեւմուտս . 'ի բարձրանալ հիմանց նորին, դժպատեհ իմն երեւեցաւ գործն յաչս Գլխաւորաց այլազգեաց, և կամեցեալ խափանել զայն՝ պատճառս յօդէին, թէ չէ օրէն առն այլազգւոյ անցանել 'ի ներքոյ կամարաց՝ յորոց վերայ բնակին քրիստոնեայք, թէպէտեւ առաջի արար նոցա զհրաման Արքային վասն այնր՝ այլ չեղեւ լսելի . հարկ եղեւ 'ի ձեռն միջնորդաց չահել զնոսա, եւ յաճախել ընծայից, զիջան 'ի խստութենէ՝ 'ի պատիւ երեսաց Պատ-